

張氏醫通



南京中医药大学图书馆版权所有

光緒三十年上海圖書  
集成印書局印



進醫通疏

江南蘇州府長洲縣監生臣張以柔謹

奏爲恭進臣父遺書事臣伏見

皇上文教覃敷

六龍南幸山陬海澨之人所獻家藏書籍盡蒙

宸鑒臣故父臣張璐自幼讀書旁通醫術年逾八十纂述成書所有醫通一十六卷本經逢原四卷診家

三昧一卷續論緒論四卷俱經刊版行世伏念

聖朝采訪遺書自天文地理下逮百家雜伎無不悉備臣父著書四種殫精竭力久而獲成幸遇

皇仁廣育壽域同登臣以柔拜舞道旁恭

呈

聖覽乞

勅史館采擇或行醫院重勘臣父子銜

恩鑲骨臣無任激切之至

張氏醫通疏



康熙四十四年四月 日進

呈奉

旨交與御前儒醫張觀查看。於四十七年閏三月二十六日具摺覆  
奏云。此書各卷。全是原于內經。可比證治準繩。奉  
旨是。卽發裕德堂。另爲裝訂。備覽。欽此。



南京中醫藥大學圖書館版權所有

序

醫書通者。長洲張君路玉所撰。古之言醫者。或論病體。或論藥性。或論治法。各有所主。又其爲說。諸家各殊。互相辯擊。雖歷代所稱名家聖手。恆不能一也。至於近世不學之徒。恆思著述。以眩一時。欺後世。醫書愈多。醫學愈晦矣。君於是考之古。驗之今。凡古人不能相一者。皆薈萃折衷之。使讀者犁然有會於中。可謂用心切而爲力勤也。君之書既行於世十餘年矣。歲在乙酉。

天子南巡至吳。君家以其書獻。深當

上意。尋

命醫院校勘。置之

南薰殿。君雖沒。而書之流布日遠。述國史藝文志者。庶列之名家聖手之間乎。昔余先少保。實以醫起家。太醫院使。而太傅文恪公始大其門。醫故吾家故業也。先少保撰立命元圭一編。兵後遺失。序君之書於

是乎有感。

康熙四十八年春王正月南書房舊史官秀水朱彝尊序



敘

嘗讀周禮。疾醫學萬民之疾。以五穀五藥養其病。以五色五氣五聲。視其生死。兩之以九竅之變。參之以五藏之動。而識醫之職。隸諸天官。故其學于是乎端。後世國無端職。家無端學。岐伯巫彭之數。久失其真。其書雖傳。皆爲後人附託。惟漢張仲景傷寒論一書。爲千百年不祧之祖。特其章句篇帙。不無散索。自王氏成氏相起。而漫次其文。因文作註。其間顛倒傳會。而仲景之意一晦。迨奉議作活人書。叔微編百證歌。模糊隱括。而仲景之意再晦。卽全生蘊要準繩等書。學者咸奉爲指南。究未能推衍其奧。而仲景之意終晦于天下。近吾友喻嘉言氏。慨衆喙之支離。憫正傳之榛蕪。取方中行條辨。重加辨釋。作爲尙論。庶幾仲景之意。較若列眉。始幸晦者之不終晦也。甲辰秋。余年家張子路玉。過婁東。携所著續緒二論示余。大要本仲景之書。別爲次第。合古今百家之言。嚴精採擇。出其心裁。辨以證治。非獨章句篇帙之有倫。而仲景千百年終晦之意。益彰明較著。無毫髮遺憾矣。余初讀之。躍然喜。輾轉讀之。忽戚然而悲。悲嘉言遽歿。不得一見其書。而與張子上下其論。相說以解也。昔許胤宗善醫。或勸其著書。胤宗曰。醫者意也。吾意所解。口不能宣也。今張子以三十年之學力。著書數十萬言。雖曠世而相感。殆如岐伯巫彭群聚有熊之庭。共開濟世生民之統。而豈周官疾醫之端守一職也耶。張子將付剞劂。嘉惠後學。余漫書數言。弁其首。



康熙乙巳春王婁東年家弟胡周鼎題

...

...

...

...

...

...

...

...

...

...

...

...

...

...



南京中医药大学图书馆版权所有

序

凡人之生根太極。含陰陽。錯綜五行。十千十二支之用。窮通強弱。死生壽夭。萬有千變。不可數紀。有聖人焉。爲之醫藥。以調其血氣。而和其性。不致疾病災厲。以枉其天年。其德與天地參。要非通乎閭闔晝夜寒暑。富貴貧賤出入。喜怒哀樂之節。沉潛貫徹。伺生殺之機於呼吸。而默爲轉移。不能行其仁術也。史所稱扁鵲淳于意。華佗之屬。診治奇妙。要皆辨色察脈。隨事觸物。肌理骨髓。動中竅緊。不拘一方。不執一說。惟其旁通而已矣。先伯父石頑先生。少而穎悟。博貫儒業。棄絕科舉。息居名山。專心醫藥之書。自黃岐詒近世方法。無不搜覽。金石鳥獸草木。一切必辨其宜。澄思忘言。終日不寢食。求析其終始。及其得心應手。起如發機。可以旋坤乾而効仁知。診一病。投一藥。參酌古今。斷以己意。靡不奇驗。居輒籍記。年既耄。彙而刻之名曰醫通。大受伏讀。深惟知其功深效多。而非小道以爲泥也。聖人治天下。鹵豔圭璧。弁冕車旂。弓矢刀劍。皆有所利用。偏而不當。其禍忽焉。醫者陳百藥。將以生人。而取舍損益。先後毫釐。俄頃機若轉。圖譬如操舟行江河。遇風濤。開頭捩舵。存亡肩睫之間。變而通之。其神也哉。其聖也已。古人之方宜徧習。而有時旁參反觀以制用也。萬物之味由天成。而有時生剋互用。水火間行。其利溥也。一身之病。而朝暮變易。不可拘也。兩人病同。而肥瘠躁緩。乘其形性。乃有濟也。或急攻之則病除。而或勿藥亦愈也。或信宿而瘥。



或經久服之有益也。遠或千里。重以千金。必致其物以救也。或一草木之滋。而膏肓遂砭也。天生人不能無疾病。授其權於醫藥。自非察於形色之表。灼知三才萬物之情理。其何以施舉手之力。扶其危。拯其顛仆。各熙熙於出入息之間。德與天地參。而恩與父母均乎。去疾如剋敵。營壘旗幟。戈矛火石。無不整暇。伺敵之隙而乘之。鼓聲所向。輒如冰消。運用之妙。一心主之。泥其成法。鮮有不敗。奉是書者。以口誦。以指畫。以神解。通其通。是爲能通醫。豈小道也哉。

康熙三十八年歲次己卯仲冬月朔姪大受百拜序



序

醫何昉乎。古之聖人如神農黃帝。首先創制。爲功萬世。下逮三代秦漢唐宋金元。莫不代有名醫。照耀紀載。周禮一書。周公所以治天下者。無一事之不備。至於醫師。特令上士爲之。不輕命人。以是知百家技藝。皆聖人之所創立。民生之不可一日無者。而醫尤甚。其參贊化育之功。幾欲中分吾儒之權。蓋本以精於藝。而因以達於德。所謂由委而遡源也。昔孔子有味南人之言。而嘆醫之不可無恆也。夫此心惺惺常存。無時不然。無時不恆矣。雖然。雷風天下之至變。聖人以之象恆者何故。蓋萬古此雷風。卽萬古此恆。觀恆者自萬古觀。非自一日觀。聖人之久於道也。豈其膠固而靡所變通哉。神而化之。使民宜之。此聖人之恆也。噫。知此斯知醫矣。丹溪不云乎。古方新病。安有能相值者。泥是且殺人。余謂醫之有譜。猶奕之有譜。師心者廢譜。拘方者泥譜。其失則均。假令劉張李朱同處一堂之上。其論不能皆合。其方不無小異。要其有濟於人則一也。家昆路玉氏。崑之望族。故明廉憲少峯公之孫。光祿烈愍公嫡姪。賦性磊落。不事章句。勵志岐黃。遂擅一時。六十年來。專心性命之學。不可謂之無恆矣。歷年博採古人方論。汰粗存精。歛繁歸約。不忍獨秘。梓而行之。將以教天下者。教萬世焉。世之師心者。讀是書。可以不煩思索。而坐得其標本緩急之理。世之拘方者。讀是書。且將樂乎其新。忘乎其故。漸漬其中。而不自覺也。豈不爲有功於後學與。昔應

効采典藝以正風俗之非。今家昆體經論以正通俗之異。非謂道在是而通俗可正也。言久於其道而天下化成也。醫之道在乎達權通變。變通之象恆顯見於雷風。吾故以是昉之。通之之義得無有取於是耶。  
康熙癸酉端午後三日晉江弟汝璠拜書



自序

齊一變至於魯。魯一變至於道。道之興廢。靡不由風俗之變通。非達道人。不能達權通變。以挽風俗之隕弊也。今夫醫道之變。至再至三。豈特一而已哉。余生萬厯丁巳。於時風俗雖漓。古道未泯。業是道者。各擅專科。未嘗混廁而治也。甲申世變。黎庶奔亡。流離困苦。中病不擇醫。醫隨應請。道之一變。自此而始。當是時也。癸癸子遺。託跡靈威丈人之故墟。賴有醫藥種樹之書。消磨歲月。因循十有餘載。身同匏繫。聊以著書自娛。歲己亥。賦歸故園。篋中輯得方書一通。因名醫歸。大都脗合準繩。其間彙集往古傳習諸篇。多有不能暢發其義者。次第以近代名言易之。草創甫成。同人速予授梓。自揣多所未愜。難以示人。僅以傷寒續緒二論先行問世。頗蒙宇內領之。壬寅已來。儒林上達。每多降志於醫。醫林好尚之士。日漸聲氣交通。便得名諫一時。於是醫風大振。比戶皆醫。此道之再變也。嗟予固陋。不能與世推移。應機接物而外。時與先聖晤對一堂。無異手提面命。遞年已來。穎禿半牀。稿凡十易。惜乎數奇不偶。曩因趨赴孝伯耿公之招。攜至雪川公署。失去目科一門。先是內姪顧惠吉。持去痘疹一冊。久假不歸。竟成烏有。知機不偶。已將殘編置之高閣。無復行世之心矣。近聞懸壺之士。與垂簾之侶。互參恆德之術。聖門之教無違。炎黃之德不顯。道之三變。匪特自今。吾於志學之年。留心是道。迄今桑榆入望。歷世頗多。每思物壯則老。時盛必衰。欲

挽風俗之隳弊。寧辭筆削之罪。知因是仍將宿昔所述之言。從頭檢點。爰命倬兒補輯。目科治例。柔鬼參入痘疹心傳。足成全編。易以通名。標諸籤額。書未竟。適逢客至。隨手開函而語予曰。在昔韓氏醫通名世已久。今子亦以是名。得無名實相混之慮乎。予謂不然。吾聞元氏集名長慶。白氏之集亦名長慶。二集並驅。後世未嘗因名混實。奚必拘拘於是耶。客莞爾而退。遂以醫通定名。迨夫三變之術。法外之法。非可言語形容也。

康熙乙亥季夏石頑張璐時年七十有九

凡例 六則

一醫學自軒岐仲景一脈相承。而近世名家視素問爲迂遠不切。傷寒論謂古法不可以治今病。至於靈樞金匱。并其書而未聞也。是編首列靈素病機。次則金匱治例。以冠諸論。第文辭質奧。非庸淺輩可知。故詳加釋義。以明其旨。獨不及傷寒論者。以傷寒續緒二論。先梓行世故也。

一藝術之學。惟醫林最繁。汗牛充棟。莫可名喻。然靈素金匱而外。求其理明辭暢。如王安道。趙嗣真。趙養葵。張景岳。喻嘉言者。指不多屈。卽歷代名醫。造藝各有所長。文理不能兼善。故選擇方論。如披沙揀金。況多支辭複義。彼此互引。不得不稍爲筆削。其文氣有不續處。略加片語以貫之。辭義有不達處。聊易數字以暢之。一切晦滯難明者。雖出名賢。槩置不錄。

一各證治例。類次系諸論之後。皆從古相承。未能逐一辨其出自某某。有例雖明確。而治未允當者。或經治驗。或加體會。易以對證方藥。非故爲舉措。變亂成則也。然亦不過如匠氏之繩墨。又必臨病審察。隨其所稟之偏勝。形志之苦樂。而爲處方。所以一例後有主二三方者。如金匱例云。短氣有微飲。當從小便去之。苓桂朮甘湯主之。氣腎丸亦主之。病溢飲者。當發其汗。大青龍湯主之。小青龍湯亦主之。小便不利。蒲灰散主之。滑石白魚散。茯苓戎鹽湯並主之。所謂醫不執方。合宜而用者。其斯之謂歟。



一古今治按。如儒者之歷科程文。而諸家所輯方書。都未之及。且從古立言。止就一端而論。人之所愚。都兼并不一。非詳究古人治驗。不能識治法之奧。故於諸按中。擇其可以爲法者。附列論例之末。非若類按之泛引稗官野史。以混耳目。

一論中所用諸方。祖方各歸其源。專方各隸本門。更有不專一門。不歸一源之方。曾採用於前者。已後但著見於某門。不復疊載。祖方則循序貫列。令知某湯中加某藥。卽爲某方治某病。究其出入增減之意。便獲古人用藥心法。蓋臨病製方。原非作意師古。卽如醫於奕者。下手輒成譜。勢與醫者之投劑。殊然。古方中有極峻厲。極迅烈。難於輕試者。有順逆反正配合。寒熱補瀉互用。深奧難明其理者。有故用相反之性。激其成功者。有奇兵暫用。隨手轉關者。各於方後發明其義。則極峻厲。極奇奧諸方。皆爲常勝之師。庶學者胸中不膠執。古方不可治今病之說。斯不愧乎大方。洵非專守藥性用藥者。可同日而語也。間有古方因病雜合。而製難於取法者。稍爲更易。以合本條治例。方下標名改定。不敢混廁以浼先哲也。

一是編證類次第。悉如準繩。而所輯方論。更迭出入。肇是甲申。迄今癸酉。歲逾五甲。稿凡十易。勒成十六卷。而所選不欲太繁。繁則郢書燕說。讀者愈滋其惑。又不能太簡。簡則井蛙鼯鼠。臨證罔知所措。務

在廣搜歷覽。由博反約。千古名賢至論。統敘一堂。八方風氣之疾。彙通一脈。俾後世修性命之學者。昭然共由。而趨世驚名者。歧路攸分。請毋事此。



南京中醫藥大學圖書館藏

張氏醫通引用書目

靈樞經

倉公醫按

傷寒論

甲乙經

日華本草經方

千金方

瘟疫論

朱奉議活人書

和劑局方

仁齋直指

明理論

製藥祕旨

黃帝素問

古今錄驗方

金匱要略

肘後方

陶氏本草經義

千金翼

聖惠方

聖濟總錄

易簡方

陳氏小兒方論

潔古要略

儒門事親

尹伊湯液

崔氏方

中藏經

深師方

巢氏病源

王太僕內經註

錢氏小兒方論

許弘內臺方

孫兆口訣

聞人規痘疹論

潔古家珍

衛生寶鑑

難經

近效方

王氏脈經

徐之才方

全氏內經訓解

外臺祕要

許叔微本事方

劉河間大書

三因方論

東垣十書

雪廠家祕

丹溪心法



南京中醫藥大學圖書館藏